

SAMOA

Faatulagaina o Aiaiga

VAEGA 1 FAATOMUAGA

1. Igoa puupuu ma le amataga
2. Faamatalaina o uiga o upu

VAEGA 2 ASO MALOLO MO TAGATA UMA

3. E mafai ona tatala faleoloa.
4. Ia tapunia Aoga ma Nofoga o galuega
5. Auaunaga ma nofoaga o galuega e tuusaunoaina
6. Malosiaga o le Minisita

7. Malosiaga o Le Ao o le Malo

VAEGA 3 TEUTEUGA

8. Tulafono o Faleoloa 1961
9. Soloia
10. Tulafono o Leipa ma Galuega 1972

VAEGA 4 AIAIGA ESEESE

11. Soligatulafono ma faasalaga
12. Tulafono faatonutonu

2008, Nu. 3

O SE TULAFONO e teuteu ai ma faavae ai le tulafono e faasino i aso malolo mo tagata uma. [25 Ianuari 2008]

UA FAIA e le Fono Aoao Faitulafono a Samoa i totonu o le Palemene ua potopoto e faapea:

**VAEGA 1
FAATOMUAGA**

1. Igoa puupuu ma le amataga-(1) E mafai ona taua lena Tulafono o le Tulafono o Aso Malolo mo Tagata Uma 2008.

(2) O lena Tulafono e amata faamamaluina i le aso 1 Ianuari 2008.

2. Faamatalaina o uiga o upu-(1) I totonu o lena Tulafono ae vagana ai ua manaomia e le mataupu nisi uiga e ese mai ai:

“faalavelave tutupu faafuasei” o lona uiga o faalavelave tutupu faafuasei e pei ona faamatalaina i le fuaiupu 2 o le Tulafono o Galuega Tinei Mu ma Faalavelave Tutupu Faafuasei 2007;

“Minisita” o lona uiga o le Minisita o lo o nafa ma galuega ma leipa i totonu o Samoa;

“faletalavai” o lona uiga o le faletalavai e pei ona faamatalaina i le fuaiupu 2 o le Tulafono o Fale Talavai 2007;

“nofoaga o galuega” o lona uiga o nofoaga o galuega e pei ona faamatalaina i le fuaiupu 2 o le Tulafono o Leipa ma Galuega 1972;

“aso malolo mo tagata uma” o lona uiga:

(a) Aso Kerisimasi;

(b) Aso e feaveai ai meaalofa;

(c) Aso o le Tausaga Fou;

(d) o le aso e sosoo ma le aso o le Tausaga fou;

(e) Aso Maliu;

(f) o le aso Toonai e sosoo ma le aso Maliu;

(g) Aso Gafua o le Eseta;

(h) Aso o Tina le Aso Gafua lea e sosoo ma le Aso Sa lona lua o Me;

(i) Aso o le Sisigafua;

(j) Aso o Tama le Aso Gafua lea e sosoo ma le Aso Sa lona lua o Aokuso;

(k) Aso malolo o le Lotu a Tamaiti le Aso Gafua lea e sosoo ma le Aso Sa lona lua o Oketopa (Aso Sa paepae);

- (l) le Aso Gafua i le tuanai ai o aso ua faasinomia i totonu o parakalafa (a), (b), (c), (d) ma le (h) pe afai o lena aso e pau i se Aso Sa;
 - (m) le Aso Lua ina ua tuanai:
 - (i) le Aso Kerisimasi pe afai e pau le Aso Kerisimasi i se Aso Sa; ma
 - (ii) le Aso o le Tausaga Fou pe afai e pau le aso o le Tausaga Fou i se Aso Sa; ma
 - (n) so o se aso ua faaalua manino e avea o se aso malolo mo tagata uma e Le Ao o le Malo e tusa ai ma lenei Tulafono;
- “faleoloa” o lona uiga o se faleoloa e pei ona faamatalaina i le fuaiupu 2 o le Tulafono o Faleoloa 1961.

VAEGA 2 ASO MALOLO MO TAGATA UMA

3. E mafai ona tatala faleoloa - E mafai ona tatala se faleoloa mo pisinisi i se aso malolo mo tagata uma.

4. Ia tapunia Aoga ma nofoaga o galuega - Ae vagana ai e faapea ua aiaia i totonu o lenei Tulafono, e tatau ona tapunia se Aoga po o se nofoaga o galuega mo gaoioiga uma i se aso malolo mo tagata uma.

5. Auaunaga ma nofoaga o galuega ua tuusaunoina - E le tatau ona faaaogāina le Fuaiupu 4 o lenei Tulafono i auaunaga ma nofoaga o galuega ua taua e faapea:

- (a) falemaliu po o sauniga tau maliu;
- (b) falemai;
- (c) faletalavai;
- (d) galuega tinei mu ma faalavelave tutupu faafuasei;
- (e) sailiga ma galuega laveai;
- (f) galuega tau leoleo;
- (g) auaunaga mo le puipugamalu;
- (h) galuega tau le pulega o otaota;
- (i) auaunaga tau felauaiga a le atunuu;
- (j) auaunaga tau vaa;

- (k) galuega tau vaalele sivili;
- (l) auaunaga i faletalimalo ma taligamalo;
- (m) galuega tau fesootaiga.

6. Malosiaga o le Minisita – E ui lava i aiaiga o lenei Tulafono po o so o se isi Tulafono, e mafai e le Minisita e ala i se poloaiga, ona faatagaina:

- (a) se aoga po o se nofoaga o galuega ina ia tatalaina i se aso malolo mo tagata uma; po o
- (b) se faleoloa ina ia tapunia i se aso malolo mo tagata uma.

7. Malosiaga o Le Ao o le Malo – E mafai e Le Ao o le Malo i le faia ai i luga o le fautuaga a le Kapeneta ona faaalua manino so o se aso e avea ma aso malolo mo tagata uma.

VAEGA 3 TEUTEUGA

8. Tulafono o Faleoloa 1961-(1) Ua teuteuina le Fuaiupu 2 o le Tulafono o Faleoloa 1961 i le suia o le faamatalaga “Aso Malolo mo Tagata uma” i le “o lona uiga o so o se aso malolo ua faamatalaina i po o ua faaalua manino i lalo o le Tulafono o Aso Malolo mo Tagata Uma 2008.”

9. Soloia - Ua soloia Fuaiupu 10, 11, 12, 13, 14 ma le 16 (2) o le Tulafono o Faleoloa 1961.

10. Tulafono o Leipa ma Galuega 1972 – Ua teuteuina le Fuaiupu 2 o le Tulafono o Leipa ma Galuega 1972, i le faamatalaga “Aso malolo faale malo” i le suia o le “Tulafono o Faleoloa 1961” i le “Tulafono o Aso Malolo mo Tagata Uma 2008”.

VAEGA 4 AIAIGA ESEESE

11. Soligatulafono ma faasalaga - O se tagata o ia lea ua solia se aiaiga o lenei Tulafono ua faia se soligatulafono ma ua

noatia i se moliaga ua faamaonia faaetulafono i se sala tupe e le silia le 100 iunite tau faasalaga po o le nofosala i le falepuipui mo le 12 masina po o faasalaga uma e lua.

12. Tulafono Faatonutonu - E mafai e Le Ao o le Malo i le faia i luga o le fautuaga a le Kapeneta ona faia tulafono faatonutonu e faatonuina ai mataupu:

- (a) o manaomia po o ua faatagaina e lenei Tulafono ina ia faatonuina; po o
- (b) ua talafeagai po o ua tatau ona faatonuina mo le faataunuina o po o le faamamaluina o lenei Tulafono.

O le Tulafono o Aso Malolo mo Tagata Uma 2008 o lo o faafocina e le Matagaluega o Pisinisi, Alamanuia ma Leipa

**Lolomiina e le Failautusi o le Fono Aoaofaitulafono,
i le pule a le Fono Aoaofaitulafono.**